



芝園集卷之二十六

碑銘志狀目錄

改建江西提學分司碑

簡軒張先生墓表

洞雲公墓志

故李母太淑人張氏墓志

宗兄野雲先生墓志

潘母錢太宜人狀

故中順大夫石窓華君狀

陳母王氏墓志

明故封孺人謝母張氏墓志銘

封太淑人顯妣孫氏壙志

明故慈谿司訓元周張君墓表

明故福建布政司左叅議東厓王公墓志銘

明故敕封孺人謝母范氏墓志銘

芝園集卷之二十六

碑銘志狀

改建江西按察提學分司碑

江西故有按察提學分司僻在城東北之隅道路夾坎輿馬行則窒乃學官弟子時謁若教肄考課胥疲餓乃至若天雨雪則貧無蓋從者莫能達官者弗便率厭棄弗處時徹承乏而來也則假他館以居史若隸曰廨也隘僻且業就圯矣旋往視之門垣弗扃雞豕直入庭堂則蒿艾被之乃藩府民居東西犬牙入也矧又大崩壞下宇上甍雨濕雲



蒸餒擾于梁鼠穴于房乃喟然歎曰異哉今之弊也法網日促謗訕肆行士無固志吏無守程故防患者密而樹績者疑風斯成矣即志士也將柰何哉然諺有之畏首畏尾身其餘幾是惡可已也乃遂謀於郡縣長吏若學官弟子初言新者半已者半繼又言遷者半新者半又繼而言遷者大同乃請於都御史御史院咸可之爰度廢濠之址東西十有七丈南北三十有九丈卜之食時乃庀材興事軌量鳩工命千戶賀春董之辛卯九月肇工越壬辰五月乃訖工前為敷教堂蒞政居之後為靜

觀堂退息居之東為友士軒教肄居之西為長春亭賓會居之於其隙聚石為山雜植菖蒲茉莉黃楊蕙蘭枇杷櫻桃焦桂竹栢并諸細草卉越若守籍胥史校士之所唯具於外觀之翼翼如也枚枚如也于內觀之仍仍如也濯濯如也已諸士至余乃進之於庭告之曰若知夫作室乎夫基薄易圯棟弱易撓始謀之過也廉隅弗飭丹雘弗勤圖終之艱也若是何能室也是故翦蒿夷棘起穢除礫築之登登以厚以平基斯隆矣聚材掄良斲枉規方以縱以橫以負以亢棟斯壯矣左右互經參錯

芝園集卷二十六
相承而門而序而級而榮輔斯備矣漆人斂物設
色效奇丹之青之藻之繪之飾斯華矣夫然後稱
善室矣夫學亦猶之剗偽去浮忠信是修豚魚可
格金石不流所以厚基也履仁負義出規入萬如
木斯升如山斯峙所以固棟也左圖右史準今撫
古困積若農深藏若賈所以備輔也德以容文言
以道章處若豹澤出若鸞翔所以華飾也是故內
受綽綽外行晬晬有恢有廓不震不剝用則庇遐
逖之民不用則自庇其身茲不為善士矣乎其或
先民之弗程大猶之弗經惟捷利邇謀是營是先
將顛危厭覆是懼而況敢庇人乎嗚呼小子念之
哉念之哉毋謂我魯無聞知母或退有懈心諸士
唯唯受命卒業請次第為記遂刻石以詔來者

簡軒張先生墓表

簡軒先生卒二十有二年墓木且拱矣其子鵠與
余同舉禮部相與服政南都有交道焉乃再拜泣
而請曰吾先子之弗揚也不肖之僂也欲嗣之弗
能其何以齒於士唯吾子卹之遂按䟽而表之曰
先生張氏諱鯨字文升直隸上海人幼性淳良不
類羣子弟長治舉子即有聲弱冠試提學數獲提

衡焉遠近之士日挾策請業門下往往得聞于時
有穎脫而出者先生文字古雅每大比輒不利而
志氣矯亢畧無沮尼益務殖于學耻為脂膏以求
達故卒鮮際遇遂偃蹇以沒云先生秉節迪行細
大不苟事父至孝奉伯仲氏周旋不解與朋友交
悃款見情素無一語詐諛遇故舊久遠不渝暗室
屋漏可詔鬼神作事必畏敬以自將嘗曰吾行吾
法爾得喪短長夫孰非天者誦讀之暇稍稍為歌
詩以自娛若都御史唐公瑜若副使譚公詔相與
唱和於煙雲水石之間有芝蘭之好焉平居無事

足不履公府郡縣長吏而下率圭璧視之以為邦
之茂士也其鄉大夫潘子恩曰先生之文猶翔鳳
也道猶龍也得時而鳴乘雲而興為儀為章雨澤
其滂而今則已矣嗚呼風之敝也兔且化亡相鼠
刺作谷風怨興緇衣好息儻莠突梯孰知其機橫
行徑踰孰測其趣如先生者非所謂質行君子與
而齟齬淹卹竟不得有一釜之祿何哉然吾觀之
嗣子鵠也愿塞不夸閔閔繼述遂成進士秩南京
武庫主事遜而能入侃侃有立矣夫是殆庶幾其
衍先生之休乎奚啻沒身之光而已也噫考德度

行匪言弗徵樹之墓道以永詔來者云爾

洞雲公墓志銘

時徹有先大夫之喪屏居銜卹我常甫司馬則自
京都寄書請為洞雲公志銘謹采撫事狀論次所
見聞徵於永永云維張氏世居鄞之槎湖自原一
府君至洞雲公凡十世公祖諱純字孟粹別號一
齋仁信有文父諱忱字汝誠別號東臯累贈正議
大夫資治尹太子賓客吏部左侍郎兼翰林院學
士惇行好禮不由師授工古詩文所著有東臯集
公諱時敏字日新親承家學通易詩二經及子史

百家言弱冠補縣庠諸生三試省中不第遂棄去
諸生藉已不復試天性聰明而沉厚善晦不妄言
笑每群衆嘲噓紛起而公獨恬如也私居廣坐恭
舒如一事無細大凜乎若畏冲乎若無所執至臨
義利之界則屹不可推挽其與人不立畛域而賢
否優劣眎列毫分即卑幼亦待以鈞禮顧於貴勢
不能少降其志居常徵載籍采寰宇述天人字格
及國家治亂興替事時以善惡預當人成敗無不
歷歷應謂數有乘除世多缺陷朴陋粗糲蓋自素
所便習至封錫高貴矣乃猶飯脫粟衣黑褐衣曳

革履往來行術陌間若無高貴封者嘗曰丈夫處世忽忽若飄風爾非吐奇厝畫流鴻名于青雲之上亦當砥節礪操表著鄉閭模於來禩曷為泯泯暗暗自同腐草乎夫金鑑惟新德鑑惟古可不懋哉乃日表經傳格言揭諸垣楹以自迪嘗題所居之柱曰天下為善最樂人生無欲是高又曰遇飽即休身外黃金無用物得閒且過世間白髮不饒人斯豈非岩穴篤行之士吮汙濁而遊高明者耶性至豈弟視臧獲豎稚常若有傷即草卉蟲豸一無所害行遇之則足縮縮避嘗赤日矧出觸熱石

因幾死亟移之陰而沃之斷棘毀甍當路遽徙擲焉乃人有善亟稱之聞有揚人之過者即愀然不樂有所貿易察人顏色須厭足乃已即給於人弗較人由是藉藉頌公長者矣而公顧益自匿靡麗華盛一切無所好惟竹樹之秀茂若佳山水顧獨嗜好成癖每雨霽風和良苗懷新油油或或散步塍壟之間逍遙忘歸以為至樂華星麗天涼月墮庭則岸幘循竹石間婉咏微吟已乃歛膝默坐踰夜分不能就寢雅不善酒遇親知酒竟日夕不厭晚復與里中高人長者為月會談笑咏歌握手以

傲極懽洽而罷郡太守鄉飲屢賓之不起親故有
所請托輒辭不納曰世間孰與名節貴者敢弗珍
乎生平不廢誦讀凡陰陽星歷子平地理風鑑之
術靡不通曉卒未嘗以情殉為詩渾厚和平發諸
性情而暢於景物有韋柳之風焉所著有洞雲稿
若干卷常甫之幼也有過不忍加撻唯隨事誨戒
或書諸器物而徐誘之比登甲第官翰林則數數
貽書以忠清公怒為訓既而上疏陳狀父母及耆
又鮮兄弟新烝井白無托者乞便地以養乃提學
湖南奉公以居出入必問所治事及所低昂諸生
得無誤否每出按部則扃戶庭戢僕隸非口用急
需不許輒市市或有謬入者亟召其人而倍償之
久之謂常甫曰汝五行弗和宜姑退避遂移疾以
還越五年起官西蜀復曰歲行猶逆逆來而順受
其免乎逾年果以多難辭歸又五年而常甫乃由
祭酒轉南少宰復題楹間云鄉祿喜沾雙慶日家
風要似未官時蓋以勅子姓折侈萌云初封徵仕
郎翰林院檢討累晉通議大夫南京吏部右侍郎
庚寅之春公中風尋愈右手足不即康至辛卯二
月二十六日復病病至二十九日而卒詎生天順

庚辰凡七十有二年 上聞賜諭祭塋葬以是年
 十二月十七日寔於葑港利嘉岸祖塋之次庚子
 加贈正議大夫資始尹吏部左侍郎兼翰林院學
 士配我嫂沈氏累封淑人長男邦彥早卒妻林氏
 守節而終 天子詔旌其門次男即邦奇常甫累
 官南京兵部尚書娶王氏先卒累贈淑人繼娶陸
 氏累封淑人女孟安適慈谿學生裘穆仲安適徐
 梗皆沈出庶子邦韶娶陸氏邦禮娶李氏側室董
 氏出常甫初鮮嗣息恒抱戚戚憂公謂曰第寬之
 汝後當多男子至四十有一而舉一子子球遂後

亡兄七齡而夭繼生子中子釋子兆某某 今

以子中後兄女四人果如公諭云邦韶生子望子

鐸某某 時徹曰吾為公志而重傷宗門之不幸

也蓋公於先大夫莫逆朝夕相對諄諄說善惡鑒

戒事重道義而尚名檢黜勢利遠之忠厚仁恕信

於賈販又隆敬祖先時享必虔宗族惇睦相保相

卹乃今稍稍替矣公病後先大夫時時往省公右

手足不良於運猶力為之治几席饋杯箸至親枕

其足今尚有此等否耶故曰吾為公志而重傷宗

門之不幸也銘曰温而恭惟德之良壽而臧維家

之祥爾昌爾熾維君子之光開於有先錫類無疆
何山不崇何流不長葑河之右桃源之陽草木
膺鸞鳳迴翔閔彼泉丘萬禩斯藏

故李母太淑人張氏墓志銘

太淑人張氏者昭勇將軍通州衛親軍指揮使司
指揮使李公素菴之配也弱小閑於姆教及笄嬪
於李宜乃室家比素庵不祿子時方七齡也矢志
曰將軍棄遺眇藐幼孤惟未亡人是屬有弗能貞
志苦節圖而成立者罔以相從於窀穸乃夙夜砥
礪躬親紡績蠶絲靡有懈怠凡服食賓祭儉而中

禮雖米鹽薪芻之類皆有經紀家以不匱性質慈
惠居常不見忿詈每臧獲有犯惟喻戒飭責不輒
任情恣睢殘以箠楚故內外嚙恩焉常勗時於學
詔之曰先人以汗馬勤勞不憚裂膚毀肢以貽績
於爾子孫爾子孫世世享有祿食若驕蕩凌德弗
念厥紹豈惟爾先人弗寧血食將亦侈及爾躬余
亦不能老死爾惟念哉我聞曰世祿之家多由惡
終驕也去驕莫如德進德莫如學爾惟念哉時是
以率篤彝訓奮志不休少從鄉學長又從武學自
賢聖經傳以至孫吳百家戰陳之法咸領要歸遂

以武舉發身日有令緒人以為淑人之成其家也
其能婦也其成其子也其能母也於乎斯可以為
女範也已生女二長適千戶張鵬次適指揮僉事
許鑑皆先時出者也孫女二長受聘於千戶王相
次受聘於指揮使楊綬婦某氏出者也其曰太淑
人者以時貴 封嘉靖壬辰春時以僉書江藩都
司奉母以來越數日寔惟四月二十八日遽以疾
終距其生天順戊寅五月二十五日凡七十有五
年時以國朝著令衰經以從官事將以某年月日
歸從其先將軍塋於某山之原乃涕泣陳詞請論
述為之銘銘曰爾山爾岬爾潛爾棲爾後爾基世
世斯無虧

宗兄野雲先生墓志銘

先生姓張諱某字惟正浙之鄞人世居槎湖之陽
曾大父文一處士諱某大父一齋處士諱某皆隱
德弗仕父東臯先生諱某博洽英肅治身及家足
範世俗而詩文清古有東臯集傳世叔父汝常處
士諱某蚤世弗嗣叔母薛氏孀居守節東臯公以
先生後之先生為人聰慧秀雅而機警善億與人
言肺腑畢露無纖芥留匿至論人情物態時時出

人意表或少雜諧詭婉而有味新而不可窮使人
聽終日不厭少治舉子業志於進取及叔氏萍鄉
先生從子司成君繼舉科第慨然曰是足振吾家
吾又奚求遂抱藝隱於耕稼工漢隸羲獻行草書
法爲詩操筆立就老益嗜好雖終食不忘瀟洒出
羣悠然有烟霞之興每雨霽日出輒循行隴畝間
夷猶槎湖之上觀鳥飛魚泳之樂見一草一木秀
穎可愛即移置庭中或植諸盆內時時灌溉相對
吟哦以為得意不屑屑焉事家人生產作業尤重
義而輕利世俗出後者析差恒得其半乃獨取四

之一而必與諸兄弟均養母氏人以為難云自奉
節約不苟靡費衣不厭澣補食不厭粗糲凡嫁女
娶婦惟稱家有無不勉強以徇時習終其身充潔
不阿雖在至親未嘗一啓齒有所干請見宗族中
有讀書應舉為禮讓事者輒懽喜不自勝若莫能
助之其有饕餮險詐致攘亂常者亦憤怒不自勝
若莫能毆之動必稱古人談義命耻規規墨丈尋
常之間以為肥饒故與人不甚相洽然人亦不能
不敬也春秋無事嘗與洞雲先生東軒先生及親
友吳礪齋先生輩為文酒會會則投壺奕棋雅歌

相和使弟子行酒必盡懽乃已嘉靖丙戌正月望日郡侯諭知先生之學行延致鄉飲未幾遂病病數日卒是月二十有六日申時也詎生成化乙酉二月三日亥時凡六十有二年配華孺人勤儉惠順相家甚力子男二長邦俊有慧性年二十四先先生卒娶楊氏工部尚書康簡公從孫女次邦傑沉靜有識娶毛氏都昌教諭士懿先生女女三長適陳坤次適陳昌言江西憲副半湖先生長子次適郡庠生陳鈺孫男二子瑄子瑜孫女一以嘉靖丁亥十二月二十九日巳時塋于西河之原時徹與先生比居而親傷先生之弗可作也適司成以狀來遂誌而銘諸幽銘曰有漚者川有苑者阡隱隱爾宮億萬斯年

潘母錢太宜人狀

太宜人姓錢氏上海願菴潘公某配也父曰存德母任媪生太夫人之幼也端重簡肅麗于女則不苟言笑及笄室于潘時姑已歿事其舅默菴公旨羞浣滌悉力共御不以委諸臧獲久而弗懈相潘治外內事瞿瞿勤勞咸中矩度沒齒無訐言凡厚宗睦隣慈幼逮下類非群女婦所能庶幾云旦夕

詔諸子曰吾不知學知吾績績可以觀學矣凍之
水暴之日絲乃潔焉經之緯之積尺而丈帛斯成
焉績以五色文斯著焉夫績以其漸也功所以績
學也弗可闕也課讀率至夜分大寒暑無間嘉靖
癸未子恩舉進士守祁及鈞奉母氏以行太夫人
性儉約日視米鹽細物食不二羞衣不重帛常曰
廉者所以立官者也儉者所以立廉者也女為庶
士女毋侈服食毋忝厥官能事我矣恩奉以周旋
用有大樹當路者交薦揚之丁亥秋遷南京刑部
員外郎太宜人亦至焉戊子春正月忽遘疾藥之
尋差秋八月願菴公携以歸未幾疾復而逝九月
十七日也距其生成化癸巳凡五十有六年子男
四人長即恩次惠次忠次恕業于庠女三人
長適顧鮑次受許相聘未行卒次適庠生俞文榮
孫男五人允明允升允文允修允言訃至恩被髮
擗踊東望哭而馳已丑之春以書來曰天乎譴恩
也弗亟而速戾于我母氏其諸謂何恩之有今也
皆母氏之由也寵光之未及色養之未舒而今則
已矣嗚呼悲乎日月有時塋將至矣惟吾子一言
之辱豈惟恩一人之幸將恩之宗嗣實終賴之時

徹與恩兄弟也知恩者深矣遂不辭而為之狀用以徵諸有文者

故中順大夫石窻華君狀

華氏宋戴公子考父食邑于華因氏焉其居四明者由萬二十府君始府君當南宋時自姑蘇徙于鄞之罌湖後又徙櫟陽寶祐橋左桂林其裔孫也名愛字仁卿別號石窻曾祖諱鈺祖諱晟俱晦逸以詩禮世其家父諱欽以君貴封南京刑部主事母呂氏木阜儋州判官朽菴公女贈安人繼母陳氏封安人君生始一月而失母鞠於外氏舅氏汀

無子遂命從呂姓後焉甫成童能博識強志甘苦于學蘄蘄然殊矣年二十三以儒士領正德癸酉鄉試繼登甲戌進士高第授南京刑部主事讞獄明決訟者不寃凡有疑滯咸為取平歷陞本部員外郎郎中乃奏復華姓奔父喪南還服闋改除南京兵部職方郎中是司素稱繁劇君從容裁決積弊振刷軍務肅清已乃出守桂林桂林民獷而好訟克斥於獄有久繫不決者君恫瘼於躬聽微析疑窮日力不懈浹旬囹圄為空時田州岑猛梗王化督兵征剿檄軍餉者絡繹桂林居會城素迫於

應上官而怠於催科逋負以百萬計乃早夜區畫
與民裁閹狹輸餽每為隣壤先徃賊莫銀僭號剗
平王率其黨數千掠桂林境熾甚官兵與對每為
挫衄君豫設伏使健卒齎公賄誘彼謀賊帥授首
餘黨悉就縛御史欲奏為首功君力辭之秩滿以
寂復舊任念以直道忤人欲退就家食而親友強
之行遷延不速進卒被劾落職諸縉紳莫不扼腕
民遮道泣送者無慮萬計君慰遣之無幾微見言
面君性溫雅清儉洞見肺腑不刻深懷詐尤惇於
孝友歲時伏臘恒以封君早棄不及滌瀆之養為

憾奉母陳朝夕怡怡不失所懽處其兄若弟無忤
言以舅氏鞠養之懃也終始顧戀為卜居近之家
居鎮日以詩書自娛興至輒携其所知夷猶於廻
溪疊嶂之間見雲蒸霧變木秀卉榮則忻然忘反
置勢分於度外癯然布素也歲不一入城府於官
府無私謁唯慇懃教子以世其業君精於書法尤
工羲獻行草而道勁美澤變化若風雲翱翔若龍
鳳雖諸名家弗逮焉為詩希盛唐風格每以王維
杜甫為至入其閫域矣藻詞舒翰之士方共翕然
向風而君顧不藥以死嗚呼哀哉君病且革詔其

子曰吾進不樹勳庸退不究學業以命之未終猶
有待也而今其已矣夫劍沉弗割鏡埋弗照將誰
知我者疆畎塗墜惟爾輩是賴爾其念哉于時縉
紳諸學士聞之莫不歎歔盡傷奔走相弔謂才儁
之不可復得也若麟鳳芝草然僅見之而斬失之
此豈有所勉而然者耶君生弘治辛亥五月初六
日卒嘉靖癸巳十二月初五日春秋纔四十三配
吳氏封安人生子三大呂娶孫氏仲呂娶楊氏南
呂聘屠氏女二德秀許聘陸鴻羽德芳尚幼孫男
二長曰坤次曰圻時徹之解官歸田也與君遊於
日嶺雪竇之間攀蘿拊石咏歌相酢自以為騷人
逐客之樂無與同者而未幾輒病病少差復以詩
來期我於寶巖之上而旋即死矣嗚呼蔓草凌蕙
野鳥咤鸞人則有然而鬼神亦復不祐謂之何哉
謂之何哉卒之次年予將有東魯之役日月不居
懼君遺行之堙也重以諸孤之請遂為之次第如
右以俟作者徵焉

陳母王氏墓志銘

王氏三山舊族也陳母生而婉慧女誠姆儀罔不
通曉其父無子甚鍾愛之嘗曰是若為兒不當大

吾門耶既長為擇配醮于陳時舅已即世事其姑
孝養恭順克盡婦道事無大小必咨之后行姑嘗
嬰疾侍奉湯藥衣不解帶者三彌月及歿哀毀踰
禮歲時薦奠修具必虔其父早卒傷其母之特而
無依也迎養于家修滫瀡藹鱻之奉衣服寒燠之宜
咸竭力為之夫性稍嚴相以柔巽夙夜夔夔終始
無間言撫子婦若孫慈愛極篤而誨之以嚴少有
過輒禁飭之恒語兒曰汝家累善汝高祖嘗教樂
清清節懿範流于士人汝大父亦讀書秉禮以遺
爾後嗣若彼作室望之堂構若彼疆畎望之播穫

汝其念哉兒每夜讀執女紅以課至夜分乃休織
絳絲枲之勤不輟寒暑而身弗厭簾惡尤好周貧
乏親戚鄰里之不足者即捐所有以資之中外稱
惠焉生男二長曰世珍補候庠生娶葉氏少曰席
珍領戊子鄉貢娶徐氏壬辰席珍會試春官不第
授勸學教諭迎母就養未幾患痰疾數未愈乃呼
席珍謂曰汝能以善誨人吾即死無憾但吾欲得
正首丘耳席珍感泣及歸見母孫兒女怡然病去
體也月餘疾復作遂弗治卒於嘉靖甲午正月十
三日未時距生成化辛丑十月十七日卯時享年

五十有四女三長曰鳳適韓洲先卒仲曰鸞適鄭公謹季曰鶚孫男二曰以言以章祖塋在北郭興聖坑之陽將以其喪附封焉席珍則泣而請銘銘曰膏雨屯霄嚴霜蘭蕙死菴施揚迢迢九霄鳳皇翺翔奠爾窀穸不顯其光

明故封孺人謝母張氏墓志銘

孺人諱文英姓張氏鄞城望族世居西關外已乃徙東郭遂為東郭張氏云父諱克謹知文業商尚德好義恂恂如也生女而惠甚愛之聞謝氏世以孝義相承謝母周早寡淑德懿行昭於里族曰是

可以為女範矣遂以女許字直齋公即贈監察御史諱表者也孺人秉性溫良不妄言笑歸而事寡姑也孝敬篤至旦夕承奉顏色中饋必身親之姑勤紡績繼晷以膏家人或頗生厭輒以物障燈力相其勞姑寢乃寢時謝氏適丁孤嫠困悴矣而孺人克佐夫子立門戶又善操贏縮之柄稍稍自給而產故瘠也每歲侵即艱食孺人務致洗腆於姑而自茹粗糲即瀕餒不愠夫叔同爨事之如事舅已而異居猶時時饋之食夫叔感而言曰從婦敬禮始終不衰其殆興吾宗乎直齋公亦皆直好義

即少壯服賈絕無私金帛而長家者析產過有軒
輕孺人曰貪德之賊也心苟不欺天將鑒焉恒以
此諷直齋公而直齋公亦唯唯信聽無它腸人咸
稱長者時按察君汝儀方在髫鬣僅一弱息而孺
人無所姑息動靜出入必嚴矩度課夜誦則紡績
與偕按察君沉毅簡重雖出天性而學業早就德
器大成則孺人之教也既而女汝婉子汝誠等相
繼以育雖煦煦啞啞憐撫切至而端其蒙養教之
孝弟蓋未始一日替正德癸酉按察君領鄉薦明年
登進士第令餘干周孺人喜謂孺人曰昔汝翁不
幸吾兒方在襁未干人焚焚在疚謂門戶隊矣不
圖今日見諸孫立也且階顯融非新婦孝敬何以
致此歲戊寅直齋公惟危疾孺人盛暑不解帶者
彌月每稽顙北辰求以身代居喪毀瘠幾不能生
然恐傷姑心旦夕強飲其哀後按察君擢監察御
史推恩贈直齋公如其官母封孺人誡之曰兒有
今日祖母之遺也我今受若封矣而祖恩未報吾
死且不瞑兒其念諸按察君受教唯謹已而僉憲
閩廣皆迎二親之任親承色養已又轉雲南叅政
畏途萬里將母不得遂陳情乞休輒報聞罷乃留

妻兒侍養携其季以行未幾轉江西按察使迂道歸省適周孺人病亟歸十日而瞑若有所待云按察君以過毀致疾比三年竟不起孺人痛其子之不祿也又通藉二十餘年窮約不改寒士即菽水亦不能支居常悒悒不放眉日抱遺孤而籲曰天乎何降割我家若是其棘乎又命汝誠曰是實在兒其念而父與而祖矣而汝誠實克承厥志旦夕色養奉卮酒上壽又訓育遺孤而植之孺人乃喜歲庚子汝誠爰解諸孫皆業校官孺人又益喜丙午冬又當會試孺人適患痰疾汝誠固不欲行而

孺人固強之乃行至丁未二月二十六日孺人疾革而逝詎生成化戊子八月十三日爲壽八十汝誠聞訃乃匍匐擗踊以歸卜以某年月日奉柩於諸家橋先塋之次啓直齋公之墓而窆焉子男三長即按察君汝儀先娶汪氏贈孺人繼范氏封孺人次即汝誠庚子舉人娶趙氏次汝立娶徐氏女三長汝婉適董梧次汝婉適沈零次汝敬適朱統孫男十長千之守之天殤次復之上之豫之大之皆校官生約之問之繼之及之尚幼孫女五人靜之端之正之福之安之俱許配名家余與按察君

雅相知也又熟聞孺人賢汝誠以其故手狀行實稽首再拜以請遂不辭而為之銘銘曰孰茹之荼弗茹其旨孰作之巢弗育其子拮据卒瘞繫孺人之始既佐其夫克開厥嗣厥嗣維何乃昌乃熾眉壽令終以介休祉以引以翼百世斯無數謂予不信視此貞石

封太淑人顯妣孫氏壙志

昔先大夫之沒也甬川尚書志其墓其言家世履行詳矣今母夫人卒不敢以內行煩學士縉紳謹志其大畧納之壙中云母夫人孫氏世家小溪山

舉有上下二族母夫人之出則俗所稱上孫舉者也洪武初有諱某者以高貴徙實京師而子孫仍業其故田宅傳至我外祖曰聰娶外祖母朱氏成化壬辰九月二十五日誕生我母母有姊氏二齡以長祿命孫生測之曰是長者富家姬少者乃大貴壽考矣既而字於先大夫先大夫則吾祖季子也未婚而析於伯仲吾母歸即主幹家事贊又窘拙拮据勞瘁以相先大夫朝夕所為孳孳每日未吐曜輒治炊以食已即執絲枲女紅時時抱哺諸子女或枕之股掌而卧仍織作不少休凡寒暑所

被服皆手自經緯紉綴蓋靡有外市者乃先大夫
讀書無他營又獨持門戶家日益落母嘆曰謬妄
哉孫生之談乎若是其困也將安所得貴矣母性
甚嚴每兒子有過必以告於先大夫先大夫又益
嚴撻罰恒過苦故不肖為兒時日廩廩俟譴無已
也憶昔數齡時母攜之歸寧偶嚼酒一夕母輒怒
笞之外祖母曰鞠小兒何刻厲乃爾母曰吾傷其
諸父皆以酒破業忍使兒輩武之耶其飭教類如
此御僮僕子婦率斤斤峻整閨庭斬然與先大夫
處亦多匡矯然於唱隨之禮則未有違者孝養吾

祖四時饗祀必致潔虔遇族黨姻婭恩禮薦至諸
先世親故貧者着破衣冠踉蹌走至門群從莫不
避匿吾母顧獨迎款饋食弗厭也晚年益務慈惠
有不如意厚自隱譬若恐傷子婦之心者徹之自
巡撫江西徙官留都也得過家上壽請母就養行
有日矣會虜犯京師天子求群臣可以攘却者
而當道謀以不肖應詔徵書及門母曰兒往矣吾
老不能從也為天下者不顧家兒母以母為念乎
然自是數聞虜入警報非時恒惕惕不怡曰幸兒
生還故問吾目其瞑乎而不肖亦以不得親含先

大夫時有風木之戚焉每夢寐未嘗不從二親周旋也歲時分少奉給及製裳衣為饋而吾母不忍輕費疾且革矣呼吾妻語之曰兒屢所寄物具在篋中盍檢而歲之母為婢子輩所私竊也吾妻固請所與曰是在吾兒矣以嘉靖三十二年二月六日卒於正寢距其生凡八十二年於乎有親不能養也沒又不能送也通天之罪尚忍言哉尚忍言哉徹初為南京精膳主事封先大夫如其官母封太安人巳而累遷福建布政司左叅政蒙皇帝覃恩又以子職加封先大夫母加封太淑人

嘉靖辛亥徹以京官三品考滿贈先大夫兵部右侍郎母仍封太淑人蓋至是孫生之言庶其徵乎母訃至不肖泣血陳情疏籲 闕下得 賜諭祭營葬並祭吾父卜以某年月日厝於三港口之原從先大夫之兆云吾兄第四人長女兄惠徵適桃浦王榮生二子而天次即時徹娶陳氏思封淑人次時敷娶洪氏次時檄娶沈氏孫男九曰邦仁邦儒邦保邦儲邦佳邦仰邦伊邦劬邦侗孫女二曰孟柔仲柔魯孫女一曰少荏其餘別有家乘不著明故慈谿司訓元周張君墓表

司訓諱悉字元周學者稱南山先生世為江西建昌南城人始祖伯良仕宋為少師金紫光祿大夫封留國公十世祖大經仕至禮部尚書謚簡肅五子皆郡太守十孫皆縣尹談者以為盛美曾祖德厚以孫昇文僖公貴屢贈資善大夫禮部尚書祖文彬父巽皆亢節自高棲隱岩穴母范氏生三子君其仲也生有異質穎敏絕倫兒時讀書一過輒成誦試之對輒應聲而中文僖公大奇之會空同李公督學輒加甄異名藉藉起矣君為文平正通達直寫胸臆期以闡說理道不務雕繪為奇而藻

躬飾行恂恂若處子未嘗以意氣加人接後生輩一與長老無異下至臧獲之賤欸欸加以惠愛不輒輕有怒詈有所交易必自甘損折非其義也一介不苟取與朋友交久而益信為人謀一如已謀有窘棘者推所有賑恤之即甚費不惜也其尤大者事親篤孝先意承志恒得其懽心有疾則調和湯藥竟夕不眠比其終也哀毀踰度喪葬一遵於禮歲時致祭齋沐悽愴粥粥然如在其上也伯氏曰慈秉性剛方人莫敢忤君事之極其恭謹少不樂長跼肅拜解而後起晚乃更相懽愛談論率至

夜分及卒經紀其家曲盡心力撫孤姪從教愛兼至不殊所生讓所居之室與之季氏曰憲少豪宕負氣不能下人君感以誠懇每有訓迪輒鞠躬聽受惇睦宗族尤異流輦輯譜系以聯屬昭穆立文會群眾子弟而課肄之講解指授必極詳明命其子容建書院於西墅曰復性之塾將以廣教也又為厚生之倉尊老慈幼之所以贍族人之貧無告者立祠書院之後四時饗祀安其先靈凡督學觀風之使咸偵其異也獎以德行之科牒可積棗矣嘉靖辛卯有廣西黃允佩者司訓南城舟方及岸

而歿君聞旅魂之無依也自以其貲營置棺歛殯于釋氏之宮越三載其家竟無至者乃復買地鳳岡之麓瘞而碑之於乎此可以觀行矣時予適以督學至廉得其狀下檄旌焉君初室趙氏婉順勤儉甚宜其家生子曰峇邑庠生娶傅氏繼李氏生女曰順英適郡庠生程霄又繼王氏生子曰峇邑庠生娶孫氏曰美邑庠生娶鄭氏女曰顯英適邑庠生李泗曰錦英許鄭叔卿孫男六人曰樾曰榴曰檀曰桃曰榭曰根君績學修行人莫不以顯融期之而數則奇也八試棘闈乃竟不利嘉靖辛亥

竟以貢上春官謂峇輩曰吾老大至此復何望哉
第得備員博士成就一二人人才上報 朝廷作養
之恩歸骨故土於願足矣癸丑十月除慈谿縣儒
學訓導甲寅四月捧檄至浙乃以初八日辰時卒
於武林之寓舍詎其生弘治甲寅八月十八日巳時
凡六十有一年訃至其家峇乃匍匐哭踊來歸其
襯將以某年月日葬于某山之原其父子皆予門
下士也而峇高才能文又予最所物色者觸暑至
廬泣而請為之碑予方有草土之戚蓋泫然傷心
焉曰阨哉元周白首窮經而不獲享一命之榮黃
訓導之客死也力為殯埋而身竟罹之天可知乎
天可知乎乃摘其行誼之大者表諸隧道使過者
必式焉曰斯高士之墓而知德者之所為文乎

明故福建布政司左叅議東厓王公墓志銘

余與鶴山王公同舉進士一見大奇之輒引以為
雷陳之交孳孳推轂如恐不及談者以為罕比公
卒乃不得銘墓而表其遺文沒齒有餘憾焉茲伯
氏東厓公卒其子進士君遠來乞盟余蓋戚然興
思曰公之兄即吾兄也銘其兄即所以銘公矣按
狀公名澈字子明別號東厓世居永嘉之華蓋鄉

英橋里王之先五代唐晉時自閩來徙宋乾道間
以海患蕩析莫溯其宗今稱始祖萬十一府君諱
惠者自其所知也惠生仕宜仕宜生玠玠生毓走
為樵雲府君公高祖也大王氏者自樵雲府君始
曾祖諱珙祖諱封父諱鉦號溪橋溪橋翁有隱德
鄉人戴之祀于社以仲子祭酒公貴封通政司右
通政母張氏封太恭人少師張文忠公字敬女兄
也公蚤歲穎異向學不戒而勤與舅氏少師公及
仲氏祭酒公自相師友揚奇耀藻赫赫有聲每試
輒裒然冠多士一時稱士望者必曰二王云正德

癸酉舉于鄉屢上春官不第謁選銓曹授禮部司
務歷陞兵部車駕員外武庫郎中舅甥昆弟並仕
于朝而少師公受上倚毗獨專鈞軸薰燭甚
灼公退然自抑一以忠信周旋其扶植善類不遺
餘力卒未嘗宣諸口齒而縉紳先生至於今稱之
不衰徊翔郎署凡十年隨其所職而恪共焉不惟
諸老群僚雅見愛重即胥史奴隸亦眷眷不忍釋
也嘉靖甲午厥配潘宜人卒于京公乞告以歸時
通政公暨太恭人俱壽八袞公承懽侍養澹無宦
情而福建叅議之命且至乃竟不赴未幾連遘

大艱服闋上疏乞休時乃閉門却掃謝絕外事至鄉隣有急難及地方利弊所宜興革者則汲汲然以身肩之所居濱海舊藉沙城以為捍衛歲久蕩蝕且盡公承溪橋公之志籲衆築治卒成保障鄉人嘖嘖誦其功嘉靖乙巳歲大饑米價驟翔道饑相望公捐廩平糴仍廣設糜粥以待餓者日就食者踰千人所全活無筭凡買置產業必稱其直不務規小利一切閒田廢寺或說其循俗告乞者輒感然曰為子孫世業而可遺之以爭端乎其不苟取如此家有貲羨而黜靡戒奢不遜時好自奉如

在約顧以義用之如修譜謀建宗祠即厚捐弗靳也歲時享祀惟豐惟恪每歲立春祭畢則大會族衆懽以酒食申以訓辭衣冠來集者幾千人肅肅雍雍如也著族約立約正司訟司糾察舉淑慝有陵噬忿爭者則遵族約以聽之不使煩干有司若孤嫠老疾及死喪無告者賑以餘帑丁田積夥役歛易清則類纂本戶冊籍使息耗有稽其樹德亢宗垂利永久皆此類也公器宇凝重平生無褻容嫚語而性度坦夷望之知其為長者近人以忠不為口惠隨貴賤小大遇之如一謙謙下人率不由

于矯不妄喜不留怒不念舊怨惟德則必酬是非
好醜皦然於中顧多務含蓄而發於義者固侃侃
也其於故舊情誼尤篤即曠遠弗遺故歸田逾久
而僚友之聲問往來者猶數數焉每事惟求自盡
而不責備於人順達時宜亦不詭隨於俗其孝友
刑于家溫恭豈弟孚於族賢聲義聞洽于遠邇卒
之日莫不欷歔痛盡歆起公而不可得也此豈有
一毫鈞名微惠之行哉公生成化癸巳九月三十
日卒於嘉靖辛亥九月十三日享年七十有九子
男二長叔果嘉靖庚戌進士次亦果癸卯舉人女
一適國子生嚴孔昭孫男四光蘊光薦光普光益
卒之又明年正月八日果等卜塋于宋魯之原族
子僉憲君德狀公行實事甚核而文甚雅馴余因
而為之銘曰曷厚其生總茲百祿曷薦其慶華茲
似續 皇國之楨鄉邦是淑昭哉令德俾也戩穀
膺膺佳城吉其得卜有鬱者松有苞者竹碩人攸
藏如金如石宋魯之原過者必式

明故敕封孺人謝母范氏墓志銘

予友果庵謝公不祿墓木且拱矣苦節淑行乃心
恒識之弗忘今厥配卒其子上之輩以所為狀泣

而請銘予戚嗟久之曰子以若翁故丐予銘予何忍弗銘按狀孺人姓范氏先世祖諱仲齊通判明州因家焉宋文正公伯氏也傳五世曰諱楷者仕至工部尚書寶謨閣直學士家世業儒率有令譽父秉仁邑庠生母張氏孺人生而淑異稍長輒能修孝弟之行簡重寡默不妄言笑坐立不徙倚閨閣之外履跡笈如也夙閑禮教中饋女紅精肄若性成若女戒列女傳諸書了了悟大旨父母甚奇之曰非得名俊士者不字適果庵公以繼室請遂歸焉事其夫如嚴賓造次必以禮時夫之祖母周



母氏張皆寡居也每晨興輒至寢所問起居退奉飲食必虔必兢兢侍其側嚮晦輒溫被扇枕日以為常接親黨族屬恭而中節御減獲莊嚴有恩身先娣姒孝敬成風平居未嘗疾言遽色顧時時親井臼執烹飪紡績組紉不敢以榮貴自逸蓋自長老以至群從莫不嘖嘖稱嘆以為孺人有女德如此也果庵公先脩兵嶺東及轉佐閩臬皆迎二親之任孺人力承色養務得其歡二親相謂曰白首而去其鄉詎人情哉非新婦孝敬何能安於此耶已乃轉叅滇藩畏途萬里不能將母公陳情乞休

輒報聞罷廼留孺人侍養而二母憶念其子斯須
不釋也孺人必百方辟解之和顏色乃已朝夕營
甘旨有弗給則鬻其釵釧其佐夫以廉孝類如此
已又擢江西按察使時周已疾革待公歸而後瞑
乃苦塊卧地哀毀骨立孺人旦夕稽顙北辰求以
身代竟不能起乃撫膺而慟曰天乎何俾我至此
極也然恐重傷姑氏之心猶勉強承奉顏色自是
悲辛痛切服粗茹糲不事膏沐者十九年惟時時
督課兩兒從師授經夜則紡績與偕兒少懈則責
之曰汝父位不滿德賁志而沒汝不能勤苦學業

底于成立他日何顏面見汝父於地下耶故謹出
入稽程業慎交遊惓惓所為訓飭初不以幼孤有
所姑息也比姑氏卒孺人晨夕哀泣自始喪至襄
事無違禮漸以羸憊忽一夕病亟謂諸子曰未亡
人惟欲訓爾輩以成父志今已矣汝其刻苦自勵
慎毋墮落以為先人羞汝其念哉越宿遂整衣襟
而逝時嘉靖三十二年癸丑八月十六日也詎其
生弘治十六年癸亥凡五十有一年果庵諱汝儀
字國正由進士仕至按察使忠孝正直表著薦紳
孺人諱汝正以夫為監察御史封子男三女二長

男千之天長女靜之適庠生屠大先憲副公倬之
子也皆前室汪孺人出次男上之豫之皆庠生上
之娶沙河知縣毛國賢之女豫之娶庠生張芳之
女次女端之字廬州通判李惟孝之子承宗皆孺
人出孫男二克紹天次克緒孫女二泚懿泚貞上
之卜以某年月日啓先公之墓而合窆焉地在諸
家橋之原銘曰材良也而可以棟室玉良也而可
以成璧女德之良惟家之則曷其徵之惟謝公之
匹我銘貞懿歸諸窀穸可朽者人不朽者石

芝園集卷之二十七

祭文目錄

祭鶴山祭酒文

祭洞雲兄文

祭少宗伯劉五清先生文

祭王處士文

祭劉紹功母翁太宜人文

祭南京右通政南湖余先生文

祭留明山方伯文

祭王太恭人文

祭王封君文

祭德菴楊太宰文

久旱告雨師之文

祭劉母柳太宜人文



王忠文公祭文

祭中丞雒三峪文

祭宋潛溪先生文

祭方正學先生文

班師祭軍牙六纛之文

平番報祀群臣文

祭萍鄉令岫雲先兄文

祭江午坡文

祭姨母文蔣公文

祭宗嫂沈太夫人文

祭堂弟廿八郎文

芝園集卷之二十七

祭文

祭鶴山祭酒文

昌黎有言惟知心之難得曠百一而為收故菌菘

之異質諒玉石其匪儔顧藐末予小子豈哲士之

良俦何鳴鶴之交和遂伐木之相求投緇末以結

好眷杖杜而興憂閔我卹我均管鮑之義引我翼

我齊王貢之休乃若江右之役實負公知而公且

諄循慰勞以為讒言醜正非我之尤既而起廢丘

園馳驅青兗亦惟汝由時乃矢心自勵靡有夙夜



芝園集卷二十七
期樹尺寸之烈以終君子之猷而公乃溘然遐舉
不復即我而同謀嗚呼公嘗語我昔馬范定交爲
異姓兄弟今予與汝豈其不侔異日得解羈馭而
還也尚將訪公於白鶴之山相與窺鴈蕩躡羅浮
逍遙埃壒之表以求所謂赤松羨門之流而今則
已矣展轉興喟其何以解予之悵愁方圖與令子
采輯遺文播揚光烈庶幾一表知己之誼而又未
知其得遂與否也嗚呼莫高匪山莫浚匪川我之
懷矣曷維其諉陳詞千里泣涕漣漣何以迪我魂
夢來宣尚饗

祭洞雲兄文

維嘉靖十年歲次辛卯四月乙卯朔南京禮部儀
制司郎中弟時徹謹以果饘香帛之奠致祭于
封南京吏部右侍郎宗兄洞雲先生之靈曰於乎
先生博大溫良之資孝友忠信之性識微洞幽之
智損已裕人之行生草弗翦生蟲弗踐服食僅安
乎素有粟帛不取夫豐羨常謂缺陷世界勿宜僂
勉求全坦然自得率履無僞能詩能禮上紹東臯
之澤為圭為璋下開令子之賢宗門儀矩鄉黨推
先雖稼穡維寶高尚樂立園之賁而絲綸有奕

褒封遞桑梓之榮祿養于茲方渥日月遽爾告凶
惜精靈之胡逝慨典刑之曷從於乎哀哉先生視
吾父其叔視吾其弟謂父貧約周旋以濟無日不
親無言不契自吾幼孩謂可訓誨爰及弱冠遂叨
祿仕聞謗則憂聞譽則喜豈浮華之是徇寔善道
以相厲而今則已矣於乎哀哉族大宗蕃小大陵
噬菟人云亡白黑斯戾作善何依不善何忌信天
道之匪謫嗟我人之莫庇抑福履之難周將隆盛
之或替於乎哀哉徹也官守所稽弗獲與含賜之
後而隤側所鍾徒望鄉而出涕而今而後凡樹德
勵行可以自力者當與常甫勉卒所圖庶幾不墜
得如先生之生而幽隱之懷獨得之趣所欲控語
於左右者莫可以喻先生之志嗚呼哀哉緘辭千
里薄奠几筵猶其顧予無我遐棄尚饗

祭少宗伯劉五清先生文

唯公生抱竒淑天錫剛貞幼而俊慧燁燁蜚聲長
究問學得路于征進退百家衣食六經負璞應世
連茹群英讀書中秘益固初盟款款論諫乃矢厥
誠逆豎煽焰佞媚群登耿耿我公介疾不朋齟齬
為寇去國十齡旻天茂威薦瘡以平簡在帝心浙

芝園集卷二十七
士于程于程浙士正學恢明繼陟二寺勿弛其緝
旋佐秩宗曰直以清抗疏大禮綱常日星蹇蹇忠
義善類所矜謂介公孤我皇是正鬼神弗職溘云
以薨典刑旣喪覆霄老成熟是不悲悶瞽憑憑况
我同袍云胡為情丹旒有翮陰雲其并淼淼瞿峽
猿狖哀鳴公茲信邁我懷怛怛觴以醴水薦以皓
繒怵怵者辭敬詔明靈尚饗

祭王處士文

子鈞起家癸未進士

曰於乎先生積學履經天路伊阻莫狂脩翎翩翩
者雛旭日遐征維家有幹維國有楨鼎養逮只奄
隕德星厥臧弗臧孰也可明於乎竹以蘖繁木以
枝榮胤嗣孔碩令善攸旌亦旣基只曷程厥成墳
彼有衍式曰棲靈川原膺膺鹿豕蒸蒸我嗟何及
於乎先生

祭劉紹功母翁太宜人文

維太宜人秉德貞純如圭如璧于藻于蘋始也相
夫畜旨茹荼繼也鞠于百爾勤劬胡寵光之方及
而遽喪其所天悲形影之不弔就祿養以周旋嗟
嗟紹功先志承顏服是官常夙夜無愆適直道之
難容爰被擯而南遷衆比周以競進悼珠玉之棄

捐方夙駕以言歸而何疾疢之遂罹紹功晝不甘
食宵不解衣靡醫弗致靡神弗祈謂秋至而將復
寧鞠凶之是期某等托交令子猶昆與季相規矩
之難合彼鬼神亦何意瞻奠几筵潛然出涕不腆
我辭情罔攸既尚饗

祭南京右通政南湖余先生文

惟公受氣剛大秉德貞純行周內外學究天人見
此令善芝蘭斯馨見彼不善若履荆榛篤信于友
篤厚于親婚姻急難恫瘝在身處湖海而不忘乎
國處廊廟而不忘乎民論忠臣與烈士每慷慨而
悲辛於乎如公者居則足以範模邦域出則足以
羽儀縉紳始也高舉為鳳為麟敷教南服中遭遭
迤幸儉夫之敗績慶直道之獲伸方飛騰以得路
遽無疾而沉淪於乎悲乎於乎悲乎清廟瑚璉豫
章棟梁天之生物各有所當何人不壽公獨天喪
何人不顯獨晦其章天乎天乎伊胡弗常某等生
則同地仕則同方托緇衣之深愛承道德之末光
念百身之莫贖橫流涕以沾裳森森寒泉淒淒故
鄉靈車云邁精爽翱翔有秩其俎有旨其觴瞻拜
几筵我哀是將公乎上下公乎四旁徒庶幾於一

奠其何以罄予之所藏於乎悲乎於乎悲乎尚饗

祭留朋山方伯文

嗟哲人之具美兮誕靈脩於南服信好姱而不群
兮齊懿德於金玉棄天路以遐征兮匪後時而先
獲持繩墨以立政兮越又平反夫岸獄彼管蒯之
菑畚兮亦既種之種稷豈鷲翰之鮮儷兮衆咸謂
之鸞鷲方累績於藩垣兮入將獨司夫鈞軸何榮
悴之靡恒兮歛遙逝而不祿嗚呼梓杞崩摧兮危
危樸檄蘭蕙銷歇兮苑矣落葉將氣數則固然兮
不能保其戩穀也抑羈馭之是厭兮又何怨乎妖
鵬也嗚呼木葉落兮山蹇我飄風發兮水揚波靈
車兮云邁陴惻兮柰何執紼兮祖道旌露兮悲歌
吟故鄉兮邇止盍歸來兮丘阿

祭王太恭人文

惟靈瓊瑤之質寶婺之精夙閑姆教懿範攸程于
主作配惟德之行爰啓哲人天路蜚騰桓桓司馬
樹績揚聲乃晉方岳光烈用增好脩績學時維司
成縉紳欽式多士準繩 帝用褒嘉弗祿荐膺况
也借老而康而寧假哉純嘏疇焉與京黃髮台背
疾疾斯嬰令子請告來旋來承乃返窀穸悶彼佳

城生屆休祉沒享光榮伊胡云戚婦喪儀刑予末
小子仲氏同升豈伊異人實惟弟兄征人報訃怛
焉內驚緘辭束帛敬薦明靈嗚呼河流浩浩雲樹
縱橫馳驅靡及維以告誠尚饗

祭王封君文

鶴山祭酒父也

惟公拓三槐之遺澤抱嘉遯之貞休好脩姱以自
潔遵聖哲之明猷藝嘉穀於疆畎力耘耨而無斲
何狼莠之弗剪乃旣穎而實碩誕賢嗣之成行颺
天路以遐征佐司馬之庶政肆有家之浚明若仲
氏之高朗與董賈而齊衡著銓曹之偉望作多士

之儀刑迺皇心之眷止時寵光之奕奕豈
帝命之有偏惟厚殖其必獲結蓮社之芳盟齒香
山之遺老駕鹿車以行樂餌靈芝於瀛島胡垢氛
之是厭遽長逝於玄冥雖壽考之令終嗟懿德之
凋零况藐末予小子誼通家而彌敦心忭憚兮莫
釋橫流涕以傷魂脩蕪詞而寄奠庶靈爽之猶存
尚饗

祭偲菴楊太宰文

文皇御極宣廟繼光臣鄰體國文敏維良燮和
樞極彛勒景瑞宗功報烈文獻澤長胤之維拓以

似以昌倚歟太宰四世克芳 孝皇禮士公首明
揚乃柄銓衡令譽允臧 武皇正位廼秉太常逆
瑾搆亂出守名邦載陟文衡兩鎮遐方黃流玉瓚
白羽大黃南夷是匡告成于 王荐歷台輔績叙
用彰遭逢 聖明柄用未央有興青蠅貝錦斯張
維公東歸泉石徜徉縉紳欽式山斗軒昂幽明胡
戾懿懃云亡凡茲在位罔不盡傷 帝用嗟悼
寵錫皇皇某等欽承 玉音式告玄藏籩豆有踐
悃欵攸將尚饗

久旱告雨師之文代作

王者立國民寔其依民之有生百穀是資而豐而
凶唯神之為邇者神乃壅闕膏澤歷時不雨蔬麥
弗登民用波亟而神若罔聞知諸穀將盡稿以死
民咸病色撫膺而顛于路曰是神寔殲予而孰又
予恤凡我有位閔茲民寔用不寧厥居豈將事者
之弗職暨于天和而神降之罰也夫然民則何辜
而俾罹此極乎唯神其降聰哀于四方民其速和
而飛廉驅而旱魃霰霖于下土使絕者舉蘇稿者
舉息民其庶有瘳乎某等疇敢不夙夜祗懇敬天
勤事以與神寐養此民也此或不聽而曰殃則有

歸豈國家所以事神與神所以承天之意也乎敢告

祭劉母柳太宜人文

於乎樹禾者食實豐木者賈材孰曰嘉生弗自所
我孰曰胤緒弗肇所開惟太宜人窈窕令姿乃降
麟鳳爲國羽儀配金玉以無瑕知式穀之有基
何鼎養之方渥遽長驚而遐之嗟嗟令子服政南
畿弗飯弗歛靡醫靡祈抱長恨兮終天徒喟慟而
驅馳凡我同袍怛焉傷悲陳薨鱣以致奠庶靈脩
之在茲

王忠文公祭文

伊天造之草昧邁真主之龍興屈羣謨於帷幄
秉白旄以雲騰殄封豨於漠北禮脩蛇於洞度旣
風驅而電掃乃天清而地寧愍有元之遺孽肆據
險而弗承維皇仁之無外軫億萬之生靈眷我
公之忠愍授明命以徂行遂陳詞而矢義葦柔遠
而休兵胡醜虜之如褻乃信讒而背盟公亢節以
嬰敵爰遘禍而結纓寧首領之不保庶肝膽之昭
明皇雷震以赫怒揮天戈而南征乃殲魁而籲
衆直掃穴而犁庭蓋公雖不獲首丘之願而實足

以宣事主之誠迨 嗣皇之離照俞撫臣之奏旌
承綸綽之渙頒乃表樹乎休聲矧後賢之繼武益
懋著於徽稱何故土之足懷即九死以如生某等
生既同於桑梓仕幸囑於典刑適墓祠之初建赫
精爽之盈盈舒素衷以致奠愧黍稷之非馨尚饗

祭中丞雒三峪文

自我之舉於春官也而識公之面自我之藩於齊
梁也而知公之心公之衆美我固不得而盡知而
公之盛德所以處我者亦猶行古之道也昔我之
藩於齊也公爲參政時則我爲長矣而公之所以
規我弼我者不但已也已而藩於梁也公爲巡撫
時則我爲屬矣而公之所以敬我聽我者不少逆
也故我上得以逭瘵官之僂而下得以免殃民之
愆雖曰夙夜不忘先人之訓而公之所以左右引
掖者亦豈少乎故我之於公亦得以盡隨事忠告
之義臨別之言猶在公耳而自今思之則尤惜其
有所未盡者蓋陳吉之治州也傲上虐下淫刑以
逞乃又以其恣睢決齧行無禮於 宗室宗室積
不能平乃疏其罪狀滿百訴諸當道然而不遽以
上聞謂上司之能劾之也我乃言於公曰吉殆矣

盍姑刺訊乎吉也直則以他故徙之如十而有一
焉則吉之褫罰庸足惜乎公方猶豫未決而間有
新進好事者沮之曰然則行 王府之言矣有司
其能立乎公乃置之不問而 宗室以其不問也
遂以其狀聞之於 上而陳吉逮矣且譴戍矣公
乃與御史上疏直之亦逮矣逮且笞矣笞且斃矣
我時在遠聞之未知公之自為之也抑亦新進好
事者從吏為之也使當時得盡言於公則必不以
其死徇一墨暴之吏而使我等抱無涯之戚也嗚
呼其可憾也已其可憾也已啣哀累月不能自將
乃馳一介之使以效生芻之薦由衷之言惟公其
鑒之

祭方正學先生文

昔孔子有殺身成人之訓孟子有舍生取義之箴
而先儒繹之曰只是成就一箇是而已於乎若正
學先生之死非所謂殺身以成仁者耶非所謂舍
生以取義者耶非所謂成就一箇是者耶蓋乙丑
之變靖難之師入矣革除之君亡矣 文皇既踐
寶祚親則 高皇帝之子也非若異姓之革命也
非有市朝之遷易社稷之變置也人心依戴縉紳

比肩而事之而先生之隆德重望又 文皇與用
事左右之所傾慕而必欲致之者也使當是時於
所謂曰仁曰義曰是者見之不的而持之不堅未
有不褰裳而就之者矣何乃褻裒而行投筆而慟
書詞以絕命不忍一詔之草而甘以其身裂肝醢
膚而使親族八百四十七人者相從於魚肉也蓋
先生之生也應木星之祥而其出也被 高皇之
眷文足駕蘇黃而不屑爲學必肩濂洛而不遽止
方將窮源洙泗而比績伊傅使道符逝聖功贊二
儀斯已矣至抱夷齊之介而殉死節之名則先生
之不幸焉耳古稱死有輕於鴻毛有重於泰山若
先生之死其謂之鴻毛乎其謂之泰山乎 文皇
嘗語人曰彼食其祿自盡其心耳 仁皇亦曰若
方孝孺輩皆忠臣也以 二聖之言若是則奚俟
於久而後論定哉於乎先生之仁成矣義取矣是
就矣死且不朽矣而天下後世猶致憾而不已者
則以九族盡夷而使千百年之宗祀不血食也於
乎哀哉徹也生同桑梓誦先生之遺文跂先生之
芳烈未嘗不惻然而悲潛然而涕也乃今持節劍
南實先生流寓之地顧瞻廟祀其爲悲也涕也又

豈如恒情而已哉乃原先生之心而告之以文幽
冥之中其謂余知先生也耶其謂不知先生也耶

祭宋潛溪先生文

嗚呼先生學究天人之際道溯濂洛之宗才優經
濟之具志存禮樂之隆丁天造之草昧乃嘉遜而
居貞遜史職而不居入龍門以采苓綜百家之邃
旨騁六籍之夷庚觀其四符八樞十二微之著蓋
非徒騫神於藝文之囿而實歆趾烈於三代之英
適元運之告逝當真主之龍興肆蒲輪以下聘
乃奮鬣而揚翎班學士之清秩亦奉旨以授經

舒黼黻之鴻猷宰文章之正盟方君臣之同樂際
夷夏而欽名師大雅之明哲遂乞身而宅畊何鴻
鵠之既舉而繒繳之復嬰終殞身於遐窟憐旅魂
之煢煢寧首丘之弗懷同湘纍以飄零嗚呼遭屯
而鷓伏兮固哲士之恒也際泰而觀閔兮非凡衆
之所明也歷年禊之渺邈煥耿光其若生播靈爽
於川服衍道派於婺城雖硃璠之異尚孰品德而
不京矧小子之固陋寔是矧而是繩瞻遺像之奕
奕涕既隕而沾纓踐豆邊以致奠庶裴著乎休聲

平番報祀群神文

惟神陰隲下民莫厥攸居善是用此不善斯誅康
我五服靖我邊圉有一不然惟神是圖蠢爾凶羌
敢行稱亂封豕長蛇日滋月蔓利則豺噬劍則鼠
竄烏合長驅四境告變掠我婦女僇我黎氓陷我
關堡殲我官兵如火斯灼如岸斯崩諸番煽動遐
邇震驚 皇赫斯怒命將徂征咨爾守土協相厥
成乃禡乃社乃鼓乃鉦熊羆虺虎牲牲啓行 皇
靈丕振殺伐用張士卒鳧藻將率鷹揚或拊其背
或扼其吭或乘其阻或擾其旁始也猿升繼之電
擊用降為導因糧於敵靡巢不破靡險不極醜類

既蕩衆寇統馘維此逆番烏行獸戰天險是憑金
湯靡患期以五旬兵以一萬遂克底定瓦解澌散
百蠻震疊耄稚歡騰桓桓將帥奏此膚功將帥曰
否惟神降靈我兵旣偃我民旣寧爰告有司乃壇
乃位潔爾肥牲侑以皜幣率先庶僚望于羣祀昭
茲幽貺永清妖沴

班師祭軍牙六纛之文

惟神職司勘亂威服九州匪肆其虐用作民休犬
戎不靖煽焰遐陬豨突豺噬毒禍四流神用赫怒
是遏是劉矯矯虎士公侯好仇奮我烏號落彼旄

頭盡殲狐鼠大震旃裘膚功既奏不作神羞乃韜
弓矢乃屏戈矛昔也哭泣今也歌謳豈曰能武維
神降庥牲牲維具以告以酬終其默相庶無後憂

祭萍鄉令岫雲先兄文

嗟乎余自來撫江西而益仰公勤民立政之烈也
比按行袁郡密邇治邑則又喟然興思焉何則
朝廷之設令長也養之以廩餼華之以采章出入
則從輿馬僕隸憑几號令清道馳驅非徒以耀耳
目而擁虛名也蓋亦有厚責焉耳事治不治民安
不安胥將誰諉乎是故有志之士早作夜思皇皇

問民所疾苦而興罷之鋤暴植良厚生剔蠹惟恐
其不給也其不然者養交市譽獵貨漁貨苟且一
切以幸遷陟之及亦惟恐其不給也此其於事治
不治民安不安豈不較然可睹哉昔公之令萍鄉
也屬當孔道冠蓋雜還故事日策馬往來送迎又
羅列盤盂饋餉客而吏弊民殃曾莫貲省邑以益
廢公乃一切簡汰繁縟日坐堂上較簿握筭搜剔
殘蠹瞿瞿矻矻窮宵旦不休或諷之自為計者則
應曰夫吾身易逸耳萬民寄命焉甘苦戚休誰當
卹者且財於民甚急也凡所為厚遺達官將以徼

榮耳榮不榮於吾身甚薄也吾縱不能子視吾民
獨奈何以其所甚急易吾所甚薄者耶方乃裁冗
費鋤豪惡毀淫祠興學校平反冤獄布德施惠與
民更始然稟故羸也不治美飲食又日勞不休監
司檄至必躬為條對民爭訟則諄諄省辨唇脣焦
火蒸蒸起久之困不能勝竟坐是病病甚竟卒傷
哉已而萍人尸祝之已又祠之學宮郡史志之曰
律身勤慎門無私謁治官如家旦起視事至夜分
不輟食寢為廢坐劬劇致疾於乎此可以知公矣
夫今之萍鄉土宇編氓猶昔也而鬪訟役斂民自

為制不復聽官府令約又豪魁負固啖噬細小而
嘯黨拒捕逐殺官兵率以為常逋負王稅不啻十
之六七此其於公之時何如哉非惟萍鄉為然也
其他邑號稱素治者亦皆弛縱防維猶如敝筭而
滑吏豪胥皆豺虎鬼蜮也案牘糾紛而黔黎疲瘵
蓋日有甚焉此其於朝廷設官之意何如哉此
無他凡以為國為民之意微而養交市譽獵貨漁
貲者衆心公之心者十不一二而反公之心者則
往往而是也思公之風在他人且猶興喟而况於
兄弟之親乎况於身肩地方之責者乎余生也後

然猶記孩豎時稍識公之丰姿既長聞芳烈於父
兄長老而今茲又得親望見公之遺愛故叙次為
文以告公九原有知其亦知予言之非阿矣乎

祭江午坡文

於乎人不易知知人亦不易况豪傑之士其曠懷
卓識又非恒情所得而測鏡者乎若午坡江君非
所謂豪傑之士與不知者則以為好副使氣矜已
凌人非人情不可近以施於用則無當而知之者
則謂其節操若山岳之聳峙文章若龍鳳之騰騫
遇事若干將之立斷議論若江河之奔瀾斯當今

之儁才也已若其衆醉獨醒衆濁獨清蟬脫汗穢
之中而皇皇淬礪於朝夕者則予蓋獨知之於乎
以知君之難則知人之誠不易也以知君者如
予無幾則知知予者如君亦無幾也而今則已矣
於乎哀哉已酉之夏予起廢海上往撫江西君以
書來曰不肖不聞君子之教久矣從前率氣質用
事不由德性吾子所覩見也乃今賴天之靈稍稍
有悟創艾靡及倘不溘先朝露庶幾亦有瘳乎充
斯意也必將克其矯亢之偏而歸之中和之則處
以儀形鄉國出以楨幹王家不徒然也而今則已

矣於乎哀哉然古人謂士論定於蓋棺言毀裂之
易而成全之難也如君者雖不得展其猷為以終
所志而竟完其令名以歿則亦未為不幸也已聞
訃都門涕與神殞緘辭千里爰告我衷於乎靈異
如君信我愛我如君其亦能知予之言乎其不知
之乎

祭姨母丈蔣公文

惟我蔣公人務於巧獨安其拙人競於華獨處其
逸訟也衆力所力惟忍胥譎以欺我誠無隱或樵
於山或釣於淵或奕於閭或稼於田孰侮而健孰

廷而嗔嬉嬉詡詡與物皆春蓋匪直岩棲野遁之
賢而庶幾乎無懷葛天之民方將以公敦薄厲偷
革彼賢器而今則已矣於乎哀哉吾母兄弟內外
俱已凋謝惟公尚在辛亥之歲公年躋八十嘗以
文壽謂公之夷曠遐筭蓋未有艾也而今則已矣
於乎哀哉某也羈宦京師不遑將母每一興思賢
腸如螿而不意復聞公之訃也顧瞻長道奮飛無
翼何能及公之堂褰帷而哭乎於乎哀哉瓣香束
帛徃奠几筵馳而送之泣涕漣漣尚享

祭宗嫂沈太夫人文

自古邦家之興莫不有女德焉矧庶姓崛起對闕
流光者耶方太夫人之歸我洞雲公也蓋竦然儒
素耳而雞鳴警戒惟德是茂敬共蘋藻力御蠶織
飭迪子孫智厲減獲日兢兢不懈外言不入於相
內言不出於庭鄉黨之稱女範者莫先焉迺甬川
太保早歲蜚聲敷歷中外文章振於館閣德望重
於圭璋纓綬之士莫不希下風而願為之執鞭謂
非太夫人之遺爾耶 天子褒嘉世德累降 恩
封比齒滿於百賜米帛存問俾其孫子中馳歸為
壽斯熙代之曠儀而人間之備福也設悅之辰溘

焉仙逝群情胥羨夫復何憾第以太保早世不得
終養其親哀麻在列哭踊盈堂而弗之與也綸音
載錫泉壤重光而弗之見也斯太夫人之所為不
瞑而吾黨同以為悲者乎飄風發發訃則南來緘
詞萬里維以告哀尚享

祭堂弟廿八郎文

嗚呼我同祖兄弟惟汝稍能生殖將作室墾田紹
我先人而胡遽死耶汝貧不能家極力經營戴星
而出戴星而入曾無一日之逸而胡遽死耶汝男
未能聘女未能歸方拮据捋荼皇皇以圖成立而

芝園集卷二十七
十九
胡遽死耶是汝目不能瞑而九泉之下亦且啣恨
於無窮矣於乎哀哉悼汝者十不一二而快汝者
十而八九公耶私耶汝亦不得而知不得而詰矣
於乎哀哉

芝園集卷之二十八

雜著目錄

書匱銘二首

紙銘

黑銘二首

筆銘

硯銘三首

印色池銘三首

畧尺銘三首

鑑銘二首

枕銘

席銘

床銘

帳銘

鎮書尺銘二首

水注銘二首

劍銘

刀銘



天平銘三首

礪石銘三首

香爐銘

盥器銘

冠銘

履銘二首

杖銘

牖銘

戶銘五首

几銘

燈銘

自警銘十二首

芝園集卷二十八

雜著

書匱銘二首

闔一闢為乾為坤一出入衆妙之門

近不離跬步而八荒咸括大不踰尋丈而萬象攸

居立不易方受人以虛雖古今之異尚孰願頷而

不頷其二

紙銘

玉不足以比索砥不足以言平時卷時舒有緯有

經資爾玄圭以代結繩我維柔而功自成



墨銘二首

人皆皦皦獨玄是崇人皆有已獨渙其躬隨感而應以施於無窮

盪兮軋一真出沕兮穆萬象作其二

筆銘

孰扣也而百氏窮孰式也而六義通始也脫穎終也藏鋒散一為萬曰維汝之功

硯銘三首

知白守黑其中不測推陳致新其用孔神固處靜其若拙實無欲而常伸

鎮乃躬虛乃中爾書爾契莫敢不來同

其二

可磨也不可撓也龍蛇之淵風雨之交也

其三

印色池銘二首

我名我姓匪汝弗呈我文我字匪汝弗徵歛之一掬而以時出之天下文明

坎我宮矣色斯其形郁郁乎文四方攸同

其二

畧尺銘三首

無思無為有嚴有翼其靜也專其動也直

非金非錫曰維其範非疆非畝曰維其畔不我或稽動罔不亂

其二

不大聲以色惟德之隅正域彼四方惟文之敷

其三

鑑銘二首

鑑于形不可選也鑑于心不可轉也

汝質弗渝汝明弗蝕正是國人其儀不忒

其二

枕銘

嚮晦宴息元首斯憑展轉反側以代曲肱視于無形聽于無聲

席銘

既安汝身既寧汝神曷遠禽獸夜氣之存

床銘

爾寢爾興矣爾寤爾寐矣時鸞皇矣時鬼魅矣維天君之向背矣

帳銘

母曰莫予云覲在帝左右一念不戒百斯其咎

鎮書尺銘二首

直以方靜而居師姬孔友程朱朝於斯夕於斯非聖人之徒與而誰與

顛之倒之非汝不飭捷捷翻翻非汝不息不識不知順帝之則

其二

水注銘二首

母曰予小江河是儲母曰予固膏澤是施我維守
雌為天下谿

曷吐曷茹弗納于汙曷多曷寡不爽其初量入為
出其有主而虛者乎 其二

劍銘

剗犀象斲蛟鯨百怪伏蒼龍精曷為之百鍊成

刀銘

不貴剛貴不折不貴飶貴不缺我惟自完遇物則
決

天平銘三首

降監生民建其有極民之聽之萬應無忒

寂然不動懸予之衡有或扣之重重輕輕 其二

爾唯無偏四方以為平叶爾唯無側四方以為則

浴爾宰衡伊胡不然可鑑非人可畏非天 其三

礪石銘二首

百忍之存無惡無數四體之平有從有革摩頂放
踵非汝之愚兼利百物非汝之德

隕然確然墮智黜聰誰其求之往來憧憧蓋為已
者拙而為物則工 其二

香爐銘

象日月盤蛟螭崇蘭桂替資施奉有德禮神祇億
萬年永無虧

盥器銘

將用汝而潔乎抑舍汝而汙乎將為隨夷之徒乎
抑為蹠躄之徒乎

冠銘

君衆體配乾元直以正百祿駢

履銘二首

無橫行行則多躓無徑踰動則多戾負繩而趨擇
地而逝造次於是顛沛於是

與其失足於人也寧失足於淵淵之溺猶可活也
名之辱不可雪也

其二

杖銘

持危扶顛左右是力一或弗戒動罔不忒

牖銘

天鑒有赫牖民孔易萬象森然孰眩其類

戶銘五首

翼翼其室有儼斯堂爰啓其戶負陰順陽遠爾回
慝迎爾嘉祥出入必戒斯戶斯臧

啓我戶面青陽頰霞燦鸞鳳翔日團圞升扶桑寢

乃興誦羲皇布百穀求千祥

其二

戶之啓向離明河沆沆草青青開三徑洽良朋何
所為談圖經薰風至素琴鳴

其三

錫山麓時氤氳戶之對西方君迎皓月禮卿雲何
所思思先民前臯契後周文

其四

戶之對玄冥峯百泉遶靈氣通誰作之君子宮考
朗鼓鏗鳴鍾詠蟋蟀歌豳風

其五

几銘

平則凭歆則棄用則珍棄則毀不自治而歆人之
貴者難矣

燈銘

星星在宮亦耀其烈膏長斯長膏滅亦滅爾德不
恒詎曰作哲

自警箴十二首

將節性而壽乎抑殉歆而天乎將日月爭光乎抑
草木同朽乎一身不治况可以治天下一身不保
况可以保鰥寡

汝之嗤人人亦嗤汝汝之尤人人亦尤汝惟謙斯
亨惟誠斯固惟恕斯無惡

其二

人亦有言夢棺者官夢穢者獲凡今之人不競于

德垢膩是甘倖門日炙如彼蝨蝮惟恐不克既其
顛踣身名胥溺惟天有鑒不可以易聖有謨訓時
予之式戒爾回邪勉爾正直必獵乃獸必耕乃穫
縱罔厚功庶無大慝

其三

孰使汝言乎啓口則是孰使汝默乎閉口則是一
啓一閉榮辱攸繫謹爾三緘遠爾尤悔

其四

士有終身之潔而壞於一旦有百行之脩而毀于
一端謹始不易圖終維艱如彼臨淵自求其濟如
彼集木自求其安何以書紳終日乾乾

其五

名可立不可襲襲乃名戕乃生

其六

積善在身如長日加益曷懋汝力積惡在身如火
銷膏曷謹汝操

其七

一行有缺不可以事父母矧可以訓子孫脩於屋
漏刑於閨門端爾跬步慎爾話言不顯亦臨一念
存存

其八

薰不易芳猶不改臭物有恒性人則無守譽豈為
榮謗豈為疲式如金玉永固爾後人之好惡於我
何有哉

其九

苦鍊成金苦脩成佛世傳不朽罔不在實乃以其
勞不以其佚尚念茲夙夜矻矻罔勤於始而怠

芝園集卷之二十八
於終罔飾於庭而肆於室厲爾好脩以莫不卒其
孰養苗而使莠殖乎孰牧牛而使牛瘠乎汝長民
也而不能求民之莫是曰民賊皇不罰汝神將汝
殛嗚呼小子土毛是食曾是不念聿脩厥職其十一
爾曰無傷剥爾床矣爾曰無害輸爾載矣胡哲而
愚亦云殆矣爾艾爾藥亟其戒矣其十二

芝園集卷之二十八終

